

Balua gba Polo pi omabhuka na gudhu na Filipoi Eli na kalanu

Polo aye nani balua inde-e pi omabhuka na Dadjua na kalanu inde ani a'o nani e bhú putu-o, bhú ndu doto na ngámá gba okpála na Loma inde abhú Makedonia-o. Ani aye balua ango-o me ani nde bhú tikpu. Li nedhinga inde ani adu lie me bua ani nde angamba ka nagu inde li obhelesi okpála koko na Dadjua gba Ebhe adu agu ne e-o, la di bua ani atsia alu bhúlá má gba ka onasuno na eu inde adu bhú Dadjua gba Ebhe inde abhú Filipoi-o.

Engú inde i ti da nau lie má gala bhú balua inde-e, a ko nagie heni pi omakilisito na Filipoi ngubula makiso inde u atima nani e pi ani ngú nateteke ani bhú ongú gba e ko. Polo aha nedhinga bhomu ngú nato masi bhú omakilisito na Filipoi ngubula me u andala bhú kulu gba Ebhe-e de, abana u adu ato mbolo lie li ndu uo hana-o.

Balua inde-e agama 'ngú kpekpeke pindji djali, naziba, nadu bini di ne 'ndjá bua inde bhú nabhuka a la di-e makobho gba makilisito. Ani atsia asuno la di makunda na kpekpeke inde li Polo adu ne e pi Dadjua na Filipoi-o.

Ongbengbe ongú inde bhú bhuku inde-e ngae inde:

Eli na kalanu 1:1-11

Engú atsia Polo kpi e kpi 1:12-26

Makobho inde bhú Kilisito-o 1:27 - 2:18

Mabhundja inde adu pi Timoté ngauo ne
Epafolodite 2:19-30

Nalila lio ka obhulu yala di ne okpekpeke 'ngú
inde ngago 3:1 - 4:9

Polo ngauo ne obi e na Filipoi 4:10-20

Eli na soso 4:21-23

Polo yi omabhuka na gudhu na Filipoi mayi

¹ Ngama Polo, bhú dabili bini ne Timoté-e, ya yi yi mayi. Ya ne obalise gba Yesu Kilisito . Ma aye balua inde-e pi ndu yi omabhuka inde bhú gudhu na Filipoi hana, pi yi obhelesi okpála di ne pi yi okpála inde ngateteke kulu gba Ebhe, ndu yi hana inde akpøtse liyi bhú dabili bini ne Yesu Kilisito-o. ² A ayo me Ebhe 'Dyi ní, bhú dabili bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú gba o-o pi yi.

Polo agie heni, ani atsia ayo di Ebhe ngú omabhuka na gudhu na Filipoi

³ Ma ngagie heni pi Ebhe, ndu nedhinga hana ma ngabhundja yi lie-o. ⁴ Ndu nedhinga hana ma ngayo Ebhe lie pi ndu yi hana-a, ma ngakpi djali. ⁵ Ma ngagie heni pi Ebhe anga yi akpøtse liyi ne ma bhú nakpokpo Bádha Ngali , nayie bha bini li 'kpí na kalanu yi abhuka lie, akolo makolo pi mbia inde. ⁶ Ma ambila ndjindji me Ebhe inde akpo nani lita bádha kulu li bua yi-e, anú bha ne di ne kalanu, ani tsia bú soso li 'kpí li Yesu

Kilisito agó lie-o. ⁷ A ndjindji me ma bhundja bha pindji ndu yi hana mo-o. Padhá de, anga bua ma abedhe ne djali ka yi, anga Ebhe asuno bádha bhú 'bu muma di ne pi ndu yi hana, ngubula me yi teteke ma nedhinga ma nde lie mbia inde-e bhú tikpu, di ne nedhinga inde ma ngakpokpo lie ne angu ma hana kukulu 'ngú pindji Bádha Ngali lie-e, kala okpála nakodho mangimbo-o. ⁸ Ebhe mbila hana me, ma ngapa kukulu 'ngú me ma ne mukunda pi yi naali. Mukunda inde ma akunda yi ne e-e, ayie ka Yesu Kilisito.

⁹ Ehe inde ma ngayo Ebhe pi yi ngú e ngae inde: ma ngayo Ebhe me mukunda gba yi-e nu bha ne kalanu, amba ateteke yi me yi mbila engú na kukulu ne lele maka yi ngadu lie sunda yi-o. ¹⁰ Abhomu-o, yi tsia mbila di nalo obabadha 'ngú. Ma ngayo ndu 'ngú bhomu-o hana ngubula me ekpi li Yesu Kilisito agie lie lie, bua yi de du má ngilili di ne me ehe bini na sisiti adú bhú yi de. ¹¹ Nakolo li 'kpi angu-o, nadhuku gba yi-e du ndjindji bhú angu gba Yesu Kilisito, amba okpála dhogé Ebhe, u toko di ani.

Polo akpi djali anga u ngakpokpo Bádha Ngali gba Kilisito

¹² Ondaise ma, ma akunda me yi mbila ndjindji me ongu inde akolo li ma-a, amene mangbo me Bádha Ngali-e yangba ne kalanu. ¹³ Ka 'ngú angu-o, ndu osudha hana inde ngalila eti gba guvelenele, di ne ndu okpála koko hana ambila me ma bhú tikpu kabula kulu gba Kilisito ma ngamene e-o. ¹⁴ La matá di-e, nau ma me ma

bhú tikpɔ-o, ato masi bhú omabhuka bhelé li kpadji gba Ngámá gba ní-o. Uo matá ne tsulu ngú nakpokpo Bádha Ngali-e ade.

¹⁵ A na paká me okpála koko ngakpokpo Bádha Ngali gba Kilisito-o, anga u ne 'ngbé bua li kute ma, u ngakunda nagɔ ma. La-a, okoko di ngakpokpo engú gba ani-e ne bua bini. ¹⁶ Obhe ngamene ne bua o bini bhomɔ-o, ngamemene anga u ne mukunda li pabili gba ma, u mbila ndjindji me kulu gba ma li bili inde-e, a ko ngubula me ma akpokpo Bádha Ngali, amba ma suno di pi okpála me a ko kukulu 'ngú. ¹⁷ Okpála ma de apa 'ngú gba o kalanɔ-o, ngakpokpo Bádha Ngali gba Kilisito anga u ngakunda me ni du nagɔ ma. Engú inde u ngakpokpo e yie li bua uo de, u ngakunda me ma zu matá likabhu bhú tikpɔ ei ane mane.

¹⁸ A mene 'he bini de. Belegɔ u du akpokpo Bádha Ngali gba Kilisito ne siti bua , i du di-e ne bádha bua, Bádha Ngali ango-o bha naae nganɔ ne kalanɔ. Kaka-a, ma ngakpi djali. La matá-a, ma adú bha ne djali, ¹⁹ padhá de, anga ma ambila me ndu okpekpeke da 'ngú bhomɔ-o hana améne me Ebhe kobho ma, anga yi ngayo ani ngú ma, Bu Bhobua inde nani li Yesu Kilisito atima e-e, la di ngateteke ma.

²⁰ Engú inde ma nga'o 'to ma 'to e naali-e, a ko me ma ahá galikpe numɔ pi Kilisito 'kpí bini de. La-a, mbia inde-e, maka ne ndu nedhinga hana-a, ma abhuka ne bua bini me, ma adú bha bini nadhøø Kilisito belegɔ ma du bhú mukobho, belegɔ ma kpi makpi. ²¹ Padhá de, anga mama-a,

ma du bhú mukobho-o, ehe inde ane ne engbé-e, a ko nadhøø Kilisito. Ma kpi makpi-e ane la matá ne bádha. ²² I du me nadu ka ma bhú mukobho píla doto ei nde ade kpadji mama na ateteke okpála-a, ma mbila kpadji bhende ayo nalo e de. ²³ Ma ngadho 'bi sunda ongú bhisi bhomu. A nga lima naali ne nayie píla doto inde ngubula me ma nu du de Kilisito. ²⁴ La-a, nadu ka ma bhú mukobho-o ndjindji kabula yi.

²⁵ Ma ambila ndjindji me, a la bhadi moko, ma du nga matá bhú mukobho, ní tsia dú ne yi bhú dabili bini ngubula me yi nu li kpadji gba Ebhe-e ne kalanu, amba yi tsia kpi di djali li kpadji angoo. ²⁶ Nedhinga ma akóto lie bhú tikpu-o, ní tsia dú matá ne yi bhú dabili bini-e, yi atóko Yesu Kilisito naali ka engú inde ani amene e mama-o.

Yi lu kpekpeke bhú nabhuka

²⁷ Engú inde ane la mane-e ngae inde: a ayo me nadhuku gba yi du li lelele maka li Bádha Ngali gba Kilisito apa lie-o, ngubula me, belegu ma go natsia yi, belegu ma go de-e, ma de dje me yi alu kpekpeke ne mabhundja bini, ne me yi ngalila ndu yi hana nabhuka gba yi inde alu pí Bádha Ngali-o. ²⁸ Yi adjé tsulu ka obhulu yala gba yi-e belegu de bini. Bhobhomu-o asuno pi uo mbámhá me, ngauo-o, u angita, la ngayi-e, yi li kpadji na mukobho. Ebhe asuno pi uo ngae. ²⁹ Padhá de, anga Ebhe suno bha bini bádha bhú 'bu gba e pi yi ngú nabhuka Kilisito de, engú bini, ani asuno bádha bhú 'bu gba e pi yi ngú nazu di likabhu kabula Bádha Ngali gba ani-o. ³⁰ Yi ngagu bhomu-o ngua gbele inde nako yi au me,

ngama-a, ma adu agu e-o. Yi la di ngadje me, mbia inde-e, ma nga bha ngagu 'gá.

2

Yi kə liyi ne kuto maka Yesu Kilisito

¹ I nde lie me yi akpɔtsɔ liyi bhú dabili bini ne Kilisito-o , bhobhomu-o ngaha angu pi yi. A mo-o adi! I nde lie me ani ne mukunda pi yi-e, bhobhomu-o ngaha angu pi yi ngú nakpata kpadji gba ani-o. A mo-o adi! A na paká me Bu Bhobua akpɔtsɔ yi ngae. A mo-o adi! A na paká me Ebhe la di ngasuno bádha bhú 'bu pi yi ngae. A mo-o adi! ² I nde lie mo-o, yi bedhe bua ma ne djali bedhe li kpadji nadu, ne li kpadji nadu ne mukunda sunda yi, di ne li kpadji nadu ne makpɔtsɔ na kukulu sunda yi. ³ Yi adú amene engú na bhayiki bhayiki de. Yi adú nabhi 'kpa yi pí mbulu yi li engú de. Engú bini, yi kə liyi ne kuto, yi du nau okpála koko me u ane yi mane. ⁴ Kpála ne kpála adú bha bini natsia engú gba e makpe de, engú bini, a ayo di natsia engú gba okpála koko uu.

⁵ Yi du bhú ka yi ne ngua mabhundja li Yesu Kilisito adu nani ne e-o.

⁶ Belegu u aviti nani lie ne Ebhe-e bhú dabili bini-e,
ani kpo nani 'ndji e ne Ebhe de me ni du ndu
'kpí hana maka ani-e de.

⁷ La-a, ani a'o ká ndu 'ngú bhomu-o hana,
ani akolo bali, u atsia azu ani kpála-kuti.
Ndu okpála hana au me a ko kpála-kuti.

⁸ Ani akə matá lie ne kuto,

ani amanga Ebhe akolo bha makolo bhú
nakpi ka e,*
inde u agi ani lie li kulusi-o.

⁹ Ka 'ngú ango-o, Ebhe ngae makpe a'e'e ani ne
abhúlá nane ndu ohe hana.

Bhú bádha bhú 'bu gba e,
ani atsia a'o 'ili li ani, inde ane ndu 'ili hana.

¹⁰ Ani amene mo-o ngubula me ndu 'he hana
inde abhúlá

di ne píla doto di ne asa doto,†
kikita lipuku o kuto kala Yesu

ngú nadhögø ani ka 'li ani-o,

¹¹ amba ndu okpála hana kpokpo mbámbá me
Yesu Kilisito ne Ngámá.

U mene mo-o, u tsia dhögø di Ebhe 'Dyi ani.

Yi du maka zi 'ke píla doto

¹² Kaka-a, ondaise ma na mukunda, maka
yi amemene lie gøme gøme-o, yi manga Ebhe
mamanga. Yi amanga bha bini ani ka de djila ma
de. Engú bini, yi manga ani la matá ane mane
nedhinga ní nde lie ne yi bhú dabili bini ade ko.
Yi mene kulu liyi pi Ebhe ngubula nasuno me yi
akobho, yi mene kulu ango-o bhú dabili bini ne
nakø liyi ne kuto. ¹³ Padhá de, anga Ebhe ngae
makpe ngamene kulu li bua yi ngubula me yi du
nakunda di ne namene ongú inde nganga li ni-o.

¹⁴ Bhú ndu kulu hana inde yi ngamene e-e, yi
adú nadi mutokono de, yi adú la di ne kpeke 'bhø
de, ¹⁵ ngubula me kpála bini aú engú na sisiti

* **2:8** 2:8 Nakpi ka e: Nani bhú nedhinga gba omaYuda-a, u adu
bha nani nagi li kulusi ongbengbe obhulu 'zi. † **2:10** 2:10 Asa
doto: A ngasuno kuti gba okpála inde amu.

napapa li yi de, di ne me yi du libhomu hana ndjindji, amba yi du ne ongisi gba Ebhe, ongisi inde li siti 'ngú nde bhú o ade. Yi ngakobho bhú ká osisiti okpála na doto inde. Yi du bhú ká uo maka zi 'ke inde ngasụ masu, ¹⁶ padhá de, anga yi ngakpokpo pi uo eli na mukobho. Abhomu-o, li 'kpí li Kilisito agó lie, ma adú kala ani ne gindaginda kabula yi, anga bhobhomu-o asuno mbámbá me kpéke kulu inde ma amene e bhú ka yi-e, ma mene padhá de. ¹⁷ Engú bini, nabhuka gba yi-e, a ko makiso inde yi ngaha e pi Ebhe-o. I du me u nde abhөлө ma-a, bhobhomu-o dú maka makiso gba ma inde ma a'o e pí bhende gba yi-o. I du mo-o, ma adú ne djali, ní tsia kpí djali ne ndu yi hana bhú dabili bini. ¹⁸ A ayo me ngayi di-e, yi du ne djali, amba yi kpi djali ne ma bhú dabili bini.

Polo atima Timoté bhú Filipo

¹⁹ I du me Ngámá Yesu nde akunda-a, ma ne 'to ma me ma tima Timoté agba yi sunda 'kpí inde, ngubula me ani gie lie-e, ani de kpokpo ngali gba yi-e muma, amba ani teteke bua ma maka ani adji di nateteke bua yi lie-o. ²⁰ Kpála koko ka ma ei ade inde ngabhundja maka ma, a ko bha bini ani. Ani a'o bua e kukulu li 'ngú gba yi-o. ²¹ Ndu okpála koko hana bha bini nga'o bua o li ongú gba o makpe, u bhundja bhende gba Yesu Kilisito-o de. ²² Timoté makpe, yi mbila ndjindji me a ko bádha kpála. Ne ma ne ani-e, ya amene kulu nakpokpo Bádha Ngali . Ani ateteke ma bhú kulu ango-o maka li ndili ateteke 'dyi e lie-o. ²³ Ma nga'o 'to ma me ma tima ani agba

yi má gala, i dɔ me u nde akodho 'ngú gba ma-a akodho-o. ²⁴ Ma ne nabhuka me, i dɔ me Ngámá nde akúnda-a, ngama di-e, ma anú agba yi oo má gala!

Polo agie Epafalodite bhú Filipino

²⁵ Ndai ma Epafalodite inde yi atima nako e me ani go teteke ma li ndu ongú bhende aneke ka ma-a, ya amene kulu ne ani bhú dabili bini. Ya agu egú ne ani bhú dabili bini. La mbia inde-e, ma abhundja me a ndjindji me ma gie ani pi yi. ²⁶ Ani ne gumu naali me ni u matá ndu yi hana. Bua ani adu nako abhúlá, anga ani adje me yi ambila me adu nako li ni ne kuo. ²⁷ A na paká me a adu nako li ani ne kuo masikpe de nakpi. La-a, Ebhe asuno bádha bhú 'bu gba e pi ani. Ebhe suno bha bini bádha bhú 'bu gba e pi ani de, ani asuno di muma ngubula me ma asía matá likabhu pí koko nane mane de.

²⁸ Kaka-a, bua ma alu abhúlá má gba me ma gie ani pi yi, yi u matá ani, yi tsia kpi djali, amba muma-a, bua ma tsia kɔ. ²⁹ Li ani akólo lie oo, yi de sia ani ne djali anga a ko ndai yi bhú 'bu Ngámá. A ayo me yi manga ngua okpála bhende maka ani-e mamanga, ³⁰ anga ani di me kpi nako li tala kulu gba Kilisito-o. Ani kpe kuo de, ani ateteke ma bhú da yi, maka a ayo nako lie me yi mene ngayi makpe, i dú me yi dú nako sii-o.

3

Lele nadu ngbingbili kala Ebhe

¹ Ondaise ma, 'li ma na soso pi yi-e ngae inde. Yi kpi djali anga yi ne okpála gba Ngámá. Ongú nako ma aye e pi yi kalanu-o, ma matá bha ngayeye ne toto. Ndala li ma tété ade, la pi yi-e, a ngubula nato masi bhú yi ne kalanu. ² Ma apa pi yi me, yi lila liyi ka okpála inde ngamene sisiti kulu-o malila. A ko obúlu. U bha bini ngau ngbéngbé engú nato okpála bhú gandja. ³ Nganí-e, ní ne okpála inde ngakodho kukulu gandja-a nganí, anga ní ngamene kulu liní pi Ebhe ne angu gba Bu Bhobua . Ní ne gindaginda anga ní ne okpála ka Yesu Kilisito . Ní 'o bua ní li ongú inde ngayie ka okpála-a de.

⁴ I dú me adu li ongú ango-o ne tata-a, ma de a'ó di bua ma tété. I du me kpála bini nde abhundja me ni ti da na'o bua ni li ongú ango-o, ngama-a, ma ambila me ta na'o bua ma tété ane bhende gba ani-e mane. ⁵ Ngama-a, ma ne kukulu Ebele, azu ma ne oEbele. Ma ne maɓsalaele, bhú piga gba Bendjame. U azu ma lie, u ato ma bhú gandja pita 'kpí madjina.* Li 'ngú bhende atsia líli gba omaYuda-a, ma nako ne muFalisai . ⁶ Li 'ngú bhende atsia nakpata líli gba ní-e li lelele-e, ma adu nako nato mbolo li omakilisito. Li 'ngú bhende atsia nadu ngbingbili inde li u aye e bhú olíli gba ní omaYuda-a, ma akpata ndundu hana má kpəkəbhə, ma ti belegu li susuka de bini.

⁷ Ma adu nako abhundja me ongú bhomu-o ti da nateteke ma. La-a, kabula Kilisito, ma au

* **3:5** 3:5 Pita 'kpí madjina: A akunda napa me pita 'kpí mananika u azu ndili lie.

ndundu hana padhá. ⁸ Ma au ndu oehe inde adu ka ma-a hana me tata tété ade. Padhá de, anga i du me ma nde ambila Ngámá gba ma Yesu Kilisito ndjindji-e, bhobhomu-o ane muma ne bádha ngae. Ma atse ndu 'he hana kabula ani. Ma ngau ongu bhomu-o bhú djila ma maka zibotu ngubula me ma sia Kilisito, ⁹ di ne me ma du libhomu hana pi ani. Ma pá matá de me ma ngbingbili kala Ebhe anga ma ngakpata líli gba omaYuda-a de. Ehe inde nga'o ma ngbingbili kala ani-e, a ko mangbo ma abhuka Kilisito lie-o. Ebhe amene ngae me ma kolo ngbingbili anga ma abhuka ani. ¹⁰ Ma akunda bha koli 'he bini. Ma akunda me ma mbila Kilisito, a la di-e me ma mbila angu inde azuku ani-o. Ma akunda la di me ma zu likabhu maka ani azu nani lie-o. Ma tsia du bedhe ngu nakpi pi ani maka ani akpi nani lie muma-o, ¹¹ ngubula me i du me Ebhe nde akunda-a, ma de zuku di maka ani.

¹² Ma abhi 'kpa ma pi mbulu ma de me ma asia oehe bhomu-o asia, di ne me ma akolo ali soso akolo-o de. Engu bini, ma ngamene ne kpeke me ma sia oehe bhomu, anga Yesu Kilisito aholo 'kpa ma makpe ngae. ¹³ Ondaise ma, ngama-a, ma pa de me ma asia oehe bhomu-o asia de. Koli 'he bini inde ma ngamene e-e, a ko napa me ma 'ili 'to ma li ongu bhende akodho 'kpi akodho-o, amba ma mene ne kpeke me ma nu ne kalanu. ¹⁴ Ma ngagu holo ne kalanu ngubula me ma kolo li bili inde ma a'o bua ma lie-o, amba ma sia makala li Ebhe nga'i ni ngu e abhula, kabula engu inde li Yesu Kilisito amene e pi ni-o. ¹⁵ A ayo me, ngani obhende inde abhele li kpadji gba

Ebhe-e abhele-e, ní dũ nabhundja moko. I dũ la me kpála koko nde ngabhundja kpi-e, Ebhe ambámba tata pi ani mambamba. ¹⁶ Belegũ i dũ bha pi-ie, ní kpata bha kpadji inde ní akpata e nakolo pi mbia inde-e ko.

¹⁷ Ondaise ma, ndũ yi hana yi kpata nganda ma. Yi banga djila yi li okpála bhende ngadhũku maka ya apana lie pi yi ko. ¹⁸ Ma pa mo-o padhá de, anga okpála bhelé ngadholo maka obhũũ yala gba Kilisito kabula nakpi ka ani li kulusi-o. Ma apa 'ngũ bhomũ-o pi yi bhũtsibhũtsi. La mbia inde-e, ma matá ngapapa ne ngũla bhũ djila ma. ¹⁹ Li 'so 'kpí-e, u anũ bhũ djua. Padhá de, anga ebhe gba uo-o, a ko 'bu uo. Uo ne gindaginda li ongũ inde a ayo me u dje nũmũ li e-o. U bha bini ngabhundja ongũ na doto. ²⁰ La pi ní-e, kuti gba ní-e abhũlál. Ní ngadjeke Ngámá gba ní Yesu Kilisito, inde di mũkobho gba ní-e me ani yie abhũlál, amba ani go. ²¹ Ani agó lie, ani ayípa kute ní na mbolo inde-e me akolo maka kute ni na angu. Ani améne mo-o ne angu inde ani di ngako angu e pí ndũ 'he hana ne e-o.

4

¹ I dũ mo-o, ondaise ma na mũkũnda, yi lũ kpekpeke bhũ Ngámá. Ma kũnda yi naali, ma ne gũmũ me ma u matá yi. Ma ngakpi djali kabula yi, ma la di ne gindaginda kabula yi.

Polo aha olíli na soso

² Kikiliako, Evodia ne Sitika, ma ayo ka yi me yi dũ ne guo 'ngũ sũnda yi, anga yi ne okpála

gba Ngámá. ³ Ma ayo di ka mu ndai ma na mukunda, teteke olisi bhisi bhomu-o mateteke, anga ya amene kulu ne uo kpekpeke, ya atsia azu di likabhu ne uo bhu dabili bini ngubula Bádha Ngali , di ne Kelema, a la di-e ndu ondaise ma koko hana inde ya amene kulu gba Ngámá ne o ko. U aye ndu 'li uo hana bhu bhuku na mukobho.

⁴ A ayo me yi kpi djali ndu 'kpi hana anga yi ne okpála gba Ngámá. Ma matá ngapapa ne toto me, a ayo me yi 'kpi djali. ⁵ A ayo me yi du ne bhuku bua pi ndu okpála hana. Yi mbila hana me Ngámá agó mbia. ⁶ Bua yi aguku belegu ka 'ngú bini de, engú bini, yi yo mangbo ka Ebhe ndu 'he hana yi nde ne gumu e-o. Yi yo ani bhu nedhinga hana. Yi yo ani, amba yi gie heni pi ani. ⁷ I du me yi nde amene mo-o, li Ebhe há guo 'ngú gba e inde ane ndu imbilangu hana-a pi yi. Guo 'ngú ango-o alila bhobua yi bhu dabili bini di ne mabhundja gba yi-e, anga yi ne okpála gba Yesu Kilisito .

⁸ Ondaise ma, 'li ma na soso pi yi-e ngae inde: a ayo me yi mbila liyi ne nabhundja pindji obabadha ongu, li okpála atotoko e-o. A ko 'ngú inde li eu nde bhu e ade, engú inde ngbingbili, engú inde li zibotu nde bhu e ade. A ko 'ngú inde nganga li okpála, engú inde li lelele. ⁹ Ongú inde ma akpokpo e pi yi, inde yi aziba e, ongu inde yi adje e bhu 'bhe ma, yi au ma ngamene e-e, yi mene ongu bhomu. Abhomu-o, Ebhe inde ahaha guo 'ngú pi ni-e du bhu dabili bini ne yi.

Polo agie heni ngubula oehe inde u atima e pi

ani-o

¹⁰ Ma ngakpi djali naali bhú Ngámá anga yi amata abhundja ma. A na paká me yi adu nako nabhundja ma kalanu. Engú bini, kpadji du nako de me yi teteke ma-a de. Nedhinga ane la bhadi naali me yi nde teteke ma de. ¹¹ Ma pa mo-o ka 'ili de me ma bhú ndibhili-e de. Padhá de, anga ma ambila lima ne nagili nganda ma bhú ndu nedhinga hana. ¹² Ma ambila lima ne nakobho bhú ndibhili, ma ambila di lima ne nakobho bhú nedhinga li ehe nde lie ka ma bhelé. Ma ambila lima ne nade ndjindji ne ndu bili hana, ne bhú onedhinga hana, belegu li ehe nazu mazu du ka ma, belegu li nedhinga na gumu, belegu li ehe du ka ma bhelé, belegu ma du bhú ndibhili. ¹³ Ma ti da nakibila ndu ongu bhomu-o hana ka angu gba Yesu Kilisito inde bhú ma-o. ¹⁴ Belegu inde lie mo-o, yi amene ndjindji ngubula nateteke ma li nedhinga ma ngazu likabhu lie-o.

¹⁵ Ondaise ma na gudhu na Filipoi, yi mbila hana me nedhinga ma abhuka nakpokpo Bádha Ngali lie bhú ndu doto gba yi na Makedonia-a, ateteke bha bini ma ne Dadjua gba yi-o. Dadjua koko bini ade inde ya amata 'kpa ya ne e. ¹⁶ Padhá de, anga ma adu lie bhú Tesalonike-e, yi atima ehe inde ma adu ne gumu e muma bhutsibhutsi. ¹⁷ A ko de me ma ngagili makalá-a de. Engú bini, ma ngagili mangbo me Ebhe suno bádha bhú 'bu gba e pi yi ane mane ka ohe yi ngapu e muma-o. ¹⁸ Ma asia ndu 'he hana inde yi atima e muma-a, ane belegu bhende ma adu ne gumu e-o. Li ma au ohe li Epafolodite

ago muma ne e lie, ehe bini neke matá ka ma de. Oehe ango-o maka makiso inde u ahaha e pi Ebhe, inde li se e nde li Ebhe ndjindji, inde di nganga li Ebhe manga. ¹⁹ A ka Ebhe gba ma-a ne bhiti ehe na bhibhiti. Aní ahá pi yi ndu 'he hana yi nde ne gumu e-o. Aní ahá pi yi li kpadji gba Yesu Kilisito. ²⁰ A ayo me u dhəgə Ebhe 'Dyi ní duduama ne duduama. A adu moko!

Polo abhana lie pi omabhuka na Filipino

²¹ Yi yi ndu okpála hana inde li Yesu Kilisito abhu o me u du ne okpála gba ni-o. Ondaise ní ya nde ne o ei-e, yi di yi mayi. ²² Ndu omabhuka koko hana inde ei yi yi mayi, ane la mane obhende ngamene kulu bhú 'ti gba 'ngbé ngámá na LomaKaisala-o .

²³ A ayo me Ngámá Yesu Kilisito suno bádha bhú 'bu gba e pi yi.

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

6b4904fb-f8ce-5931-8218-7cee8914232c